

**Peningkatan Subsidi Gula Untuk Mengurangkan Beban Rakyat - Ismail Sabri Bernama
29 Januari, 2012**

BERA, 29 Jan (Bernama) -- Langkah kerajaan meningkatkan subsidi gula daripada 20 sen sebelumnya kepada 54 sen bertujuan mengurangkan bebanan rakyat, kata Menteri Perdagangan Dalam Negeri, Koperasi dan Kepenggunaan Datuk Seri Ismail Sabri Yaakob.

Beliau berkata dakwaan yang dilemparkan pembangkang kononnya ia bertujuan memancing sokongan rakyat kerana pilihan raya umum dijangka tidak lama lagi merupakan satu tohmahan.

"Itu adalah tohmahan pembangkang dan ia tidak betul kerana ia tidak ada kena-mengena dengan pilihan raya," katanya kepada pemberita pada majlis sambutan Tahun Baru Cina Parlimen Bera di sini.

Jumaat lepas, Ismail Sabri berkata kerajaan memutuskan untuk mengekalkan harga gula pada harga RM2.30 sekilogram walaupun harga pasaran dunia telah meningkat. Sehubungan itu, subsidi gula meningkat daripada RM262.41 juta tahun lepas kepada RM567 juta pada tahun ini.

Menteri itu berkata sekiranya subsidi gula tidak dinaikkan, harga bahan mentah itu akan meningkat di pasaran dan ia akan turut mengakibatkan kenaikan harga produk-produk lain.

Ismail Sabri berkata berikutan kenaikan harga gula di pasaran dunia, beliau tidak menolak kemungkinan akan meningkatnya kegiatan penyeludupan gula ke negara jiran dan langkah bagi membendung kegiatan itu akan dipertingkatkan.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=642774>